

Q. F. F. Q. S.  
SPECIMINIS ACADEMICI,  
DE  
**RATIONE DEUM**  
*NON*  
**IGNORANTE,**  
PARTEM POSTERIORREM,  
Ex Suffragiis Ampliss. Facult. Philosoph.  
in Regia Academia Aboënsi,  
PRÆSIDE

*Max. Reverendo atque Amplissimo VIRO,*

**DN. MAG. CAROLO**  
**MESTERTON,**  
Log. & Metaph. PROFESS. Reg. & Ordin.  
*Publicæ bonorum Disquisitioni*  
**PRO GRADU MAGISTERII,**  
*Divina adfulgente Gratia,*  
*Ventilandam sistere constituit*  
**GREGORIUS CHRISTIAN**  
**LIGNELL,**

*WEX. SMOLANDUS.*

Ad diem V. Julii MDCCL.

*L. H. Q. a. m. S.*

ABOË, Impressit DIRECT. & Typogr. Reg. Magn. Duc.  
Finland. JACOB MERCKELL.

# Clarissime Domine Candidate, Amice Honoratissime!

**E**x quo tempore Tecum, Amice exoptatissime, probitate  
Tua morumque integritate ac elegantia illectus, amicitiam  
colere oscepi, animum Tuum, dubiis fortunæ fluctibus diu  
jactatum ac debilitatum quidem, nunquam tamen fractum,  
aut abjectum, magni semper feci. Indefesso autem Tuo in  
Palladis palestra desudandi studio præcipue in sinu gavisus sum,  
sperans aliquando fore, ut ibi mitior fortuna adspectus Tibi  
tandem illucesceret. Nec spe illa, utut debili, pro genio sortis  
asseclarum Minerve moderno, innixa fulcro, frustratus sum;  
cum jam in arenam etiam, Apollini dicatam, altera vice Te-  
met descendere, pro RATIONE DEUM NON IGNORANTE,  
seculo sane, quo vivimus, equis defendenda velisque, egregio  
ausu publice decertaturum videre contingat. Jam igitur legi-  
bus amicitie manifestam inferrem injuriam, si, tam lato re-  
rum Tuarum statu, publico applausu insigne conamen præcla-  
rasque animi ingeniique vires Tibi ex animo non congratularer,  
votis adjectis calidissimis, velit Summum Supremumque Nu-  
men præmiis Te ornare virtute Tua Dignissimis, nec non progres-  
sus ulteriores Tibi largiri felicissimos, ex quibus in Rempubli-  
cam Temet ipsum Tuosque, quorum interest, cunctos, fructus  
tandem redundant uberrimi, letissimi!

JAN JANSSON,  
O. Gothus.



I. N. J.

§. XI.

**E**X attributis Divinis in priori nostræ opellæ parte a nobis commemoratis, infinitudinis nempe & independentiæ, sponte sua fluit unitas Dei. Quod infinite perfectum est, id non solum independens est, verum etiam tale, ut omnia alia ab eo dependeant. Si aliquid esset ita independens, ut alia juxta se pateretur æque dependentia, utique non esset infinite perfectum, cum concipi posset major perfectionis gradus in ipso consideratus, qualis in eo esset a quo omnia dependerent. Quid? quod duo dependentes fingerentur, sic enim uterque facere posset, quod alter prohibere non posset, adeoque uterque utriusque potentiarum agendi limites poneret. Neuter igitur esset in operando independens, adeoque nec in es- fendo, cum hæc nequeant a se ipso divelli. Patet hinc, quam absurdus sit omnis *Polytheismus*, & speciatim *Manicheismus* duo singens æterna & independentia principia, alterum boni alterum mali. En: du- plicem Deum, utrumque imperfectum, utrumque non Deum. Adversus unitatem Dei & quidem singularem, objici solet illa, sive communitas, sive commu- nica.

hicabilitas essentiae Divinæ in tribus personis, sic enim  
argumentantur antitrinitarii: quod commune est aut  
communicatur pluribus, non est unum numero ac  
singulare, sed essentia Divina communis est, aut com-  
municabilis pluribus, nempe tribus in Deitate perso-  
nis, ergo non est una numero, ac singularis. Ad  
hoc argumentum responderi sic debet: primo quod  
spectat phrasin, melius dicitur essentia Divina com-  
munis tribus personis, quam aut communicabilis  
aut communicata; nam tres personæ in S. S. Tri-  
nitate, habent quidem unam eandemque numero  
ac singularem naturam Divinam communem, sunt  
enim unus idemque singularis Deus, sed natura Di-  
vina nulli personæ, ab altera est aut communicata  
aut communicabilis, nam qui ordo est inter tres  
S. S. Trinitatis personas, is non spectat naturam Di-  
vinam, sed hypostasin ac substantiam singularem,  
ratione cuius Pater aliquid Filio, & uterque Spiritui  
Sancto communicasse dicitur, quæ communicatio  
pro termino ad quem, non habet naturam Divi-  
nam, hujus enim respectu singulæ personæ sunt  
autotheos, sed pro termino ad quem, habet substanti-  
am, quæ communicatur, ut sic loquamur, non  
subjective sed effective; neque enim illa substantia,  
quæ est aut Patris aut Filii, per processionem æ-  
ternam fit Spiritus Sancti: sed Pater Filio, genera-  
tione æterna, uterque Spiritui Sancto, processione  
æterna, peculiarem communicat substantiam, mo-  
do nobis incomprehensibili.

## §. XII.

Inter attributa Divina numeratur etiam *immensitas*, per quam negatur Deum loco vel excludi, vel includi posse. Definitur a nonnullis, quod sit *ubertas interminabilis*. Res ipsa quidem dubio caret: qui enim infinitus est nullam mensuram admittit, admitteret vero si spatii terminis contineretur. Circa modum vero difficultates tantæ te offerunt, ut proposit ignorantiam ingenue fateri, quam aliquid temere definire. *Cartbesiani* quidem videntur facilius se expedire, qui ut locum a spiritu in genere alienissimum esse docent: ita tanto minus spiritui illi summo convenire putant. Itaque dicunt Deum esse ubique operandi virtute, non negantes tamen Deum etiam ratione essentiæ suæ adesse, cum *essentia*, *potentia* & *operatio* unum idemque sint. Hæc explicatio aliis non satistacit, qui urgent immensitatem Dei locum habuisse etiam ante existentiam mundi, cum Deus non dum extra se operatus esset. Itaque ab immensitate distinguunt omnipræsentiam, quippe quæ est relativa, respectum creaturarum involvens, quibus præsens dicitur, & simul ubique operosa, cum omnia sustentet & ad motus eorum concurrat. At ante creatum mundum Deus sibi soli præsens erat, nec quicquam adhuc posuit, in quo infinitam virtutem extra se operandi exercebat. Ut igitur immensitatem Dei explicit, configunt ad spatiū quoddam æternū & infinitū, sed hic rursus inter se mirum in modum dissentient. Alii enim spatiū illud ipsum

Deum esse statuunt. Alii denique illud non reale, sed imaginativum tantum, & nihil esse dicunt. Quæ omnes opiniones, cum vel minimum periculosæ, vel impiæ, vel denique prorsus ineptæ sint, agnoscimus, cum ob rationum evidentiam, tum vero maxime luculentissima S:æ S:æ testimonia, Deum esse vere immensum & ubique omnipræsentem, idque non solum operatione, verum etiam essentia, sed modum immensitatis nobis plane ignotum esse.

### §. XIII.

Pergimus ad ea attributa, quæ pro nostro concipiendi modo essentiam Divinam non universam, sed veluti ex parte, id est sub certa relatione consideratam spectant. Talia, vel intellectum, vel voluntatem Dei respiciunt. Quæ duo, ut in omni spiritu, ita & gradu eminentissimo, in spiritu infinito locum habent. Si nulla omnino mens concipi possit sine facultate, per quam se ipsam saltem sentiat, absurdum esset, omniumque absurdissimum, si quis fingeret eum, qui solus vitam independentem & absolute perfectam vivit, destitui facultate intelligendi, sine qua ne ullus quidem gradus vitæ, vere & proprie sic dictus, esse posset, & sapientissimam & potentissimam omnium rerum causam, quæ ut cæteris omnibus essentiam & facultates suas, ita & finitis mentibus intelligendi virtutem tribuit, eo carere, quod aliis dedit, & sine quo nec sapiens, nec potens esset. Necesse igitur est, Ens summe perfectum, intellectu pollere summe perfecto. Hujus intuitu ipsi tribuitur *omnis scientia.*

*scientia.* Quod Divinum attributum, ut pro imbecillitatis nostræ ratione digne concipiamus, sunt quædam observanda, partim circa modum sciendi, partim circa Divinæ scientiæ objecta. Divinum sciendi modum, negativo magis, quam positivo attingimus conceptu. Nimirum, cum nostram cognitionem, partim sensitivam, partim collectivam seu rationalem esse animadvertisimus, facile deprehendimus, neutram Deo satis dignam esse. Evidem cum in nobis duplex sit sensus, unus per quem mens nostra sui ipsius est conscientia, alius vero res a se diversas percipit, necesse quidem est in Deo agnoscere aliquid priori sensui simile, sed tamen immensa cum dissimilitudine. Mens quidem nostra sui est conscientia, sed quam imperfecte, vel ex eo conjicere licet, quod fere nusquam magis hæreat, quam in sui ipsius natura paulo accuratius rimanda, ubi impiger sui scrutator sensim in hac sui notitia progreditur, nova & antea incognita de se ipso identidem detegendo: sed se tamen ipsam nunquam totam exhaustiendo. Deus autem ita sui ipsius est conscientius, ut totius Divinitatis abyssum complectatur, idque sine omni successione, & simul uno simplissimo & æterno actu. Quantum vero attinet ad illos sensus, qui nobis res a nobis distinctas repræsentant, cum talis repræsentatio manifesto involvat passionem ab alio, talis vero passio, necessario implicit dependentiam, planum est hujusmodi sensitivam cognitionem alienissimam esse ab eo, a quo omnia sine exceptione pendent. Jam omnis collectiva cognitio,

gnitio, cum scientiæ incrementa includat, hæc vero ignorantiam supponat, Deo perfectissimo utique indigna est, ut taceam omnem collectionem rationis, plures mentis actus a se invicem distinctos & mutuo succedentes involvere. Enti vero perfectissimo omnem realem distinctionem, pariter ac successionem indecoram esse, quemadmodum ex attributis simplicitatis, immutabilitatis, æternitatis in priori hujus opellæ parte expositis patet. Restat igitur, ut dicamus cognitionem Dei ita esse comparatam, ut se ipsum & præter se omnia tam possibilia, quam actualia sine omni dependentia ab objectis, in se ipso accuratissime cognoscat, idque uno eodemque actu æternum constanti, qualis cognitio, distinctionis causa, intuitiva dici solet, magis exprimens, qualis non sit, quam qualis sit Divinus sciendi modus, utpote nobis incomprehensibilis. Quod si jam in cognitione Divina ne actuum quidem distinctioni ullus est locus, tanto minus hic fingere licebit diversa cognitionis genera. Scientia Divina licet in se simplex & ubique eadem, objectorum tamen varietas in causa est, cur agnoscatur triplex scientia, simplicis nempe intelligentie seu naturalis, libera seu visionis & denique media. Ita Poiretus, per scientiam simplicis intelligentie, seu potius intelligentiam Dei, intelligit unice Divinam sui ipsius cognitionem, quam solam naturalem, id est, necessariam statuit. Cetera vero non actualia tantum, verum etiam possibilia ad scientiam visionis rejicit, cum possit horum omnium

80

omnium ideis carere DEus sibi sufficientissimus, unde  
& scientiam liberam dicit. Verius autem & ex com-  
muniori terminorum usu scientia simplicis intelligentiae  
complectitur, non tolum infinitam DEi essentiam; ve-  
rum etiam cujuscunque possibilitatis rationem, utpo-  
te in ipsa essentia Divina, non in libero ejus arbitrio  
quærendam. Scientia vero *visionis* spectat quævis actua-  
lia a DEo diversa, & tam præterita quidem & præsen-  
tia, quam futura seu necessaria necessitate, vel ablo-  
luta, vel hypothetica seu omnino contingente. Scien-  
tia tandem *media* unice referenda est ad futuribilia, id  
est talia, quæ posita certa conditione futura fuissent,  
sed quia conditio non appetit, non fiunt. Qualem  
scientiam admittendam esse non sacer modo codex,  
verum etiam ipsa ratio docet. Quod DEus omnia &  
possibilia & actualia ex agentium arbitrio non suspen-  
sa, etiam antequam contingent provideat idque prorsus  
independenter, rationi non adeo inopinatum accidit.  
Possibilia enim omnia intelligit DEus, dum ipsam es-  
sentiam suam, unicum omnis possibilitatis fundamen-  
tum intuetur: Actualia vero, quæ per naturales &  
necessarias causas fiunt, in liberrimis suis decretis u-  
nica horum omnium ratione contemplatur. At futu-  
ra mere contingentia quomodo assequatur DEus, quis  
novit? Nobis suffecit ex invictis argumentis scire, quod  
scientia DEi, etiam ad hæc se extendat, modum rei  
incompræhensibilis sine indignatione & pudore igno-  
ramus.

## §. XIV.

*Respectu voluntatis Divine*, primo nobis occurrit *Libertatis attributum*, quod ubique a voluntate ita est inseparabile, ut sit ipsa voluntas. Cum libertatem in nobis met ipsi deprehendamus, eamque agnoscamus, facile animadvertisimus, hanc DEo omnium perfectiōnum fonti, eminentissimo gradu, tribuendam esse. Ubi vero distinctum *Libertatis Divinæ conceptum* formare conamur, tantæ nobis obveniunt difficultates, ut humanum ingenium, quantumvis excellens, plane obruant. Si ad *Libertatis Divinæ ideam*, sola Ejus a necessitate externa independentia sufficeret, in promptu esset elicere, Ens illud æternum, quod essentiam suam nemini debet, eo minus dependere posse a quacunque re extrinseca, quæ voluntati ipsius vim inferret. Verum vel *creatæ mentis libertas* latius patet, ita ut quamlibet excludat necessitatem, etiam intrinsecam. Videtur indifferētia quædam ad libertatem requiri, ut possit libere actus suos mutare DEus. Quæritur, an DEus intuitu creaturarum se indifferenter habeat? Manifestum quidem est, DEum nullis creaturis egere, cum ab æterno fuerit per se beatissimus. Sed quæri tamen potest, annon sapientia & bonitati *Divinæ convenientius* fuerit, quoddam creare, quam non creare, cumque prius indubitatum videatur, annon DEus quod optimum est, & sibi convenientissimum, ita sequatur, ut non possit non sequi? Distinguvi hic solet inter necessitatem absolutam, & necessitatem sapientis, quæ hypothetica

ea tantum est, & libertatem non tollit. In spiritibus finitis evidens est hujus distinctionis usus. Cum enim sapientia in ipsis sit contingens, ita ut adesse & abesse possit, utique necessitas illa, quæ ex hac sapientiæ conditione suspenditur, cum tantum hypothetica sit, non evertit voluntatis indifferentiam. Creatura enim, ut aut sapiens aut non sapiens esse potest, ita & agere, quod sapientiæ regulis conforme est, aut non conforme. At in DEo necessitas illa sapientis in absolutam videtur necessitatem resolvi, cum sapientia, essentialis DEo sit, non minus, quam cetera Ejus attributa. Quemadmodum igitur conditio impossibilis reddit propositionem simpliciter negantem; itaque videtur conditio necessaria absolutam inferre necessitatem. Alia est ratio, ubi Electionis Divinæ diversa quædam sint objecta, sed quæ ad finem tamen a DEo intentum pariter valeant. Tali enim casu, cum gloriæ Divinæ æq; consulatur, nulla aliis alia appetit præferendi necessitas. Similis, si non major difficultas occurrit, si libertatem Divinam, cum summa Ejus simplicitate conciliare conamur. Evictum enim antea est, nullam in DEo realem compositionem locum habere posse. Itaq; actus Divini, & essentia Divina re ipsa, unum prorsus idemq; sunt. At essentia Divina absolute est necessaria, cum necessitate, autem absoluta constare nequit libertas: quomodo igitur ratione essentiæ, Ens absolute necessarium, ratione vero actuum suorum Ens summe liberum dici potest DEus, si essentia actusque DEi idem sint? Nec facilius cum æternitate & immu-

tabilitate Divina Ejus conciliatur libertas : Aeternitas enim necessitatem involvit , quæ libertati inimica videtur , & rursus libertas , actus mutandi potentiam significare videtur , cum tamen omnis mutatio , ab DEo immutabili sit aliena . Quæ omnia abunde fatisq; evincunt , nos , licet DEum liberrimum esse sciamus , rationem tamen libertatis Divinæ plane non assequi .

### §. XV

*Voluntati Divine* convenit etiam attributum *justitiae* , cuius norma est ipsa Divina essentia , neque enim alia lex æterna quam DEus securatur a nobis concipi debet , nisi eum independentem , dependentem fingere velimus . Exterit le vero Divina justitia , non eo tantum , quod DEus in suis actionibus pulcherrimam attributorum omnium harmoniam servet illibatam , verum etiam , quod legem constituat in ipsis attributis suis fundatam , qua dirigantur creaturæ . Ad hanc DEi justitiam *legislatoriam* , pertinet etiam *justitia vindicativa* , quam ipsa ratio , quantum ad rō ēti attinet , facile assequatur , monente *Apostolo Rom. I. v. 32* . Quemadmodum non solum per rationes , quas contemplatio naturæ nostræ suppeditat , verum etiam per in ernal quendam mentis sensum monemur de Divina æterna quadam actionum nostrarum norma ; ita facile an m advertit ratio , frustraneam fore hanc Legislatoris operam , si a præscripta forma liceret impune recedere .

### §. XVI.

*Justitiae* jungimus *bonitatem* , quæ cum una alterita temperet , ut suavis sit utriusq; harmonia , nec vel per

per bonitatem *justitiae*, vel per *justitiam* bonitati quicquam decedat. Unde in DEum per quam impii sunt, cum bonitatis detimento *justitiam* qui interpretantur, vel bonitatem *justitiae* inimicam fingunt. Intelligitur vero *bonitas relativa*, respectum creaturarum involvens, quibus DEus tamquam fons omnis boni, quicquid realitatis & perfectionis habeant, juciter communicat.

### §. XVII.

*Potentiam Divinam* inter attributa ad voluntatem pertinentia merito referimus. Significat enim vires agendi Ente infinito indignas. At voluntas & actititas, ut in omni spiritu, ita & in DEO, unum idemque sunt. *Potentiae Divine* conceptum justum vero ad formandum, juvat attendere, cum ad *Divinum agendi modum*, tum ad *objecta*, quæ complectitur *Divina agendi facultas*. Ad prius quod attinet, sciendum est, DEum in efficiendo aliquid extra se, non, quemadmodum creaturis caducis contingit, aliquo medium agere adparatu, sed omni possibili effectu unum & solum DEi velle sufficere; ut enim DEus in essentia sua est independens, ita & in operacionibus. Objecta omnipotentiae *Divinæ* sunt omnia possibilia, hoc est, quæ nullam involvunt contradictionem. Talia non posse, nullam in agente arguit impotentiam, cum grandem imperfectionem idea ipsorum includat, summa vero Ejus perfectio est, quæ nullam plane imperfectionem admittere potest. Distingvi quidem solet inter contradictoria ex parte DEi,

DEi, & parte rei, quasi illa fieri repugnaret propter perfectionem DEi, hæc vero propter pugnam quandam rei intrinsecam. Aliud possibilitatis principium non agnoscimus, quam ipsam DEi essentiam. Possibile DEO autem est, quicquid cum summis Ejus attributis suaviter conspiret, impossibile vero quicquid his inimicum.

§. XVIII.

*Infinitæ potentie non minus quam sapientie & bonitatis Divinae evidentissimum argumentum est creatio. Sapiens, ut nihil frustra lucepit, ita nec operis sui negligens esse potest. Ita generatim patet necessitas Divine providentiae, quæ magis adhuc erit evidens, si singula ejus momenta contemplemur, qualia tria complectitur rerum nempe creatarum, Divina sustentatio, concursus DEi ad omnes creaturarum actiones, & deniq; omnium eorum, quæ eveniunt gubernatio & sapiens ad fines suos directio. Ad primum quod attinet ex ipsa rerum finitarum indole patet hujus necessitas. Quemadmodum hæ omnes dependentes sunt in fieri, ita pariter in esse suo, & ut sibi metiis existentiam suam dare non potuerunt; ita nec aliunde acceptam, pro suo arbitrio vel prorogare vel interrumpere. Conservante causa igitur egent, cum non necesse sit, ut semper esse pergent, quæ semel esse cœperunt. Nam contingentia, qualia omnia finita esse cuiq; constat, inter esse & non esse ubiq; monent indifferentiam. Unde non magis necesse est, ut esse pergent, postquam semel extiterunt, quam, ut existent, cum nondum essent, sed Ejusdem illius infinitæ*

& si-

& simul liberrimæ voluntatis virtute esse suum semel acceptum continuant, cuius beneficio primum acceperunt esse suum, unde & conservatio non incommode dicitur continua creatio. Frustra igitur objicitur potuisse DEum opera producere tantæ perfectionis, ut sua virtute se conservarent.

## § XIX.

Quæ rationes Divinam rerum sustentationem requirunt, eadem & concursum DEi ad actiones & motus in creata natura occurrentes postulant. Nam & hic requiritur creaturarum a DEo dependentia, cui tam debent quod opera possint, quam quod sint, aut esse cœperint, & hæc ipsa actionum dependentia est, quæ obscuriori illo Divini concursus termino designatur. Jam quod ad modum rei attinet, cum alii *concursum immediatum* urgeant, alii *mediatum* sufficere arbitrentur, neutri parti sine limitatione suffragari possumus. Distingvimus nimirum inter motus corporis & mentis cogitationes. Ad illos non solum immediatum DEi influxum requiri largimur, verum etiam totos Divinos esse putamus. Quemadmodum enim plane capi non potest, quomodo spiritus creatus per vim aliquam naturalem & sibi insitam corpora movere possit; ita & evidens videtur corpora, quæ tota sunt passiva, nec te ipsa movere possunt, motum etiam aliis corporibus excitare non posse, præsertim cum motus active consideratus involvat determinationem liberam & indifferentem inter motum & quietem, ita hanc vel illam speciem, hunc vel illum gradum motus. Determinatio autem talis supponit cogitatio;

cognitionem ab omni materia alienissimam. Rursus cogitationes mentis finitæ vel passivæ sunt, vel activæ. Illæ oriuntur, vel ex motibus corporis, & nituntur eadem lege unionis, qua motus corporis nostri voluntarii, vel ex aliis præviis cognitionibus, quorum nexus ad ipsam internam & divinitus tributamentis indolem pertinet, ita a DEo dependens, quemadmodum ipsa natura mentis ab ipso pendet. At quantum ad liberas ipsas finitæ mentis determinationes adtinet, non alium concursum concedimus, quam mediatum in eo versantem, quod facultas se determinandi, & primitus a DEo data sit, & ab eodem jugiter conservetur.

## §. XX.

Divinum omnium rerum regimen ex posteriori abunde constabit, si modo recte attendamus, partim ad universi hujus concinnum ordinem in merifica omnium rerum veritate constanter servatum, & singularum partium conformatiōnem ubique sapientissime accommodatum, partim ad providentia Divinæ specimina in humana societate passim obvia, seu singulorum hominum fatæ, seu integrarum civitatum ortum, incrementa, interitus, imprimis vero ecclesiæ miraculosa propagationem, & in tanto acerrimo rum hostium numero perennem conservationem spectemus. A priori vero, ut rem demonstremus, sufficit argumentum quod subministrat summa DEi sapientia, cuius munus, cum in eo versetur, ut excellentissimos sibi fines præstitat, me lique adhibeat aptissima, quis dubitet DEum universam rerum seriem ita disponere, prout suis summis finibus maxime convenit. Ultimus DEi finis est sua gloria, non quasi ex creaturarum affectu quicquam ad felicitatem DEi sibi sufficientissimi accederet; sed quia Ens summum non nisi summus decuit finis, superior autem & dignior esse nequit eo, qui ad ipsum ita tendit, ut creaturis infinitam natura sua excellentiam patescendo, simul æternæ sua felicitatis rivulum ad has derivet. Huic fini subserviunt singuli rerum usus, totidem particulares & intermedii finis.

## §. XXI.

Ex iis, quæ breviter de primo Ente Ejusque excellentissimis attributis disseruimus, sponte sua patescit DEi incomprehensibilitas. Cum enim per se manifestum est infinitum a finito capi non posse, tum in singulis attributis recessendis verantes, ubique imbecillitatem rationis nostræ tanto negotio imparis animadvertisimus. Hic quidem verus hujus contemplationis scopus est, ut Divinam magnitudinem pie obstupescentes, nostram simul infirmitatem recte metiamur.

**SOLI DEO GLORIA.**